

*Աշխարհագրություն*

УДК 551.58

**ԲՈՒԺԱԿԱՆ ԶԲՈՍԱՇՐՋՈՒԹՅԱՆ ՏԵՂԸ ԵՎ  
ԱՌԱՆՁՆԱՀԱՏԿՈՒԹՅՈՒՆՆԵՐԸ ՏՈՒՐԻԶՄԻ ՀԱՄԱԿԱՐԳՈՒՄ**

Վ. Վ. ԳՐԻԳՈՐՅԱՆ \*

*ԵՊՀ սոցիալ-տնտեսական աշխարհագրության ամբիոն, Հայաստան*

Մեր օրերում բուժական զբոսաշրջության կազմակերպումն իրականացվում է աշխարհագրական տարբեր միջավայրերում, որոնց ուսումնասիրությունը չափազանց կարևոր է: Հոդվածի շրջանակներում կատարվել է վերլուծություն բուժական զբոսաշրջության տեղաբաշխման առանձնահատկությունների վերաբերյալ, աշխարհի տարբեր տարածաշրջաններում, տրվել են չափանիշներ:

**Keywords:** medical tourism, active tourism, passive medical tourism, medicinal bathing, medical mud.

**Խնդրի դրվածքը:** Համաշխարհային տնտեսության համակարգում կարևոր դերակատարում ունի զբոսաշրջությունը, որն իր առանձնահատկություններով անմիջական և միջնորդավորված ազդեցություն ունի տնտեսության տարբեր ճյուղերի վրա: Զբոսաշրջությունն ամբողջությամբ ընդգրկված է փոքր և միջին ձեռնարկատիրության ոլորտում և ներառում է մարդկային ռեսուրսի սոցիալապես խոցելի այնպիսի խավեր, ինչպիսիք են՝ կանայք և երիտասարդները: Կարելի է նշել, որ զբոսաշրջության զարգացման արդյունավետ պլանավորումն ու կառավարումը զգալի դեր ու նշանակություն կունենան երկրի կայուն տնտեսական զարգացման ապահովման և այնպիսի սոցիալական խնդիրների լուծման գործընթացում, ինչպիսիք են՝ աշխատատեղերի ստեղծումը, հասարակության եկամուտների ավելացումը, բնակավայրերի համաչափ զարգացումը, աղքատության հաղթահարումը:

Վերջին տասնամյակներում ամբողջ աշխարհում զբոսաշրջության համակարգում մեծանում է բուժական զբոսաշրջության հանդեպ հետաքրքրությունը: Բուժական զբոսաշրջությունն առանձնանում է մի շարք առանձնահատկություններով, որը թույլ է տալիս այն դիտարկել զբոսաշրջության շուկայում որպես ինքնուրույն ոլորտ


Զբոսաշրջության համակարգում առանձնանում են երկու կարևոր ենթաճյուղեր՝ առողջարանային-վերականգնողական և առողջարարական [1, 2] (տես գծապատկեր):

Զբոսաշրջության հիմնական տեսակների մեջ ուրույն տեղ ունի առողջարանային-վերականգնողական զբոսաշրջությունը:

Առողջարանային՝ վերականգնողական հաստատությունը բուժական-խարզելիչ հիմնարկություն է՝ նախատեսված այն հիվանդների համար, որոնք

\* E-mail: [v.grigoryan@ysu.am](mailto:v.grigoryan@ysu.am)

կարիք ունեն բնական բուժիչ միջոցների (կլիմա, հանքային ջուր, բուժիչ ցեխեր), ինչպես՝ ֆիզոթերապիա, բուժական մարմնամարզություն:



Բուժական զբոսաշրջության կառուցվածքը:

Առողջարանները հյուրանոցային տնտեսության մասնագիտական այն օբյեկտներն են, որոնք բացի հյուրանոցային ծառայություններից, մատուցում են հատուկ կարգի սպասարկում, այդ թվում՝ առողջարանային, բուժական և վերականգնողական:

Առողջարանը (սանատորիա, լատիներեն՝ sanare – առողջանալ բառից) սահմանվում է որպես բուժիչ-պրոֆիլակտիկ հաստատություն՝ նախատեսված բուժման, պրոֆիլակտիկայի և բժշկական վերականգնման (ռեաբիլիտացիայի) համար՝ գլխավորապես բնական բուժիչ, ֆիզիկական գործոնների կիրառմամբ [3]:

Առողջարաններում բուժական և պրոֆիլակտիկ նպատակներով օգտագործվում են բնական, բուժական ռեսուրսներ, որոնց շահագործման համար առկա են ենթակառուցվածքների ցանց:

Բուժական զբոսաշրջությունը նպատակաուղղված է կլիմիկաներում՝ բարձր որակավորում ունեցող մասնագետների օգնությամբ՝ բուժմանը, թերապիային, ախտորոշմանը և առողջության վերականգնմանը, հասարակության մտավոր և ֆիզիկական վիճակների պահպանմանը:

Առողջարանային-վերականգնողական զբոսաշրջության կազմակերպման հիմքում ընկած են առողջարանային-վերականգնողական ռեսուրսները: Դրանք սահմանվում են որպես բնական կլիմայական գործոնների և արհեստականորեն ստեղծված ենթակառուցվածքի համախմբություն՝ նախատեսված առողջարանային-վերականգնողական և հանգստի միջոցառումների համար, որոնք բնորոշում են բազմաթիվ տարածքներում առողջության ամրապնդման և հանգստի համար անհրաժեշտ կուրորտային համալիրների զարգացման հնարավորություններն ու հեռանկարները:

Առողջարանային-վերականգնողական ռեսուրսներն ապահովում են առողջարանային-վերականգնողական ու հանգստի գործունեությունը՝ բնական կլիմայական գործոնների, ենթակառուցվածքի և կադրային ներուժի օգտագործման հաշվին [4]:

**Հետազոտության արդյունքների վերլուծություն:** Բուժական և առողջարարական զբոսաշրջության զլխավոր առանձնահատկությունն այն է, որ դրանք իրենց գործունեությամբ սահմանագատված չեն: Հասկանալի չէ, երբ է ավարտվում բուժական զբոսաշրջությունը և սկսվում՝ առողջարարականը: Այսպես, զբոսաշրջիկը բժշկական կենտրոնում, որը գտնվում է ծովափին, ենթարկվել է վիրահատության: Նա միաժամանակ ստանում է երկու տեսակի ծառայություն՝ ծովափի բժշկական կենտրոնում վիրահատություն (բուժական տուրիզմ), իսկ ծովափում՝ բուժական արևային ու ադի ջրային լոգանքներ (առողջարարական տուրիզմ): Բուժական զբոսաշրջության տարանջատման հիմնական չափանիշը տարածքային տեղաբաշխման անհամապատասխանությունն է: Զբոսաշրջիկի բուժումը կարելի է իրականացնել ցանկացած բժշկական կենտրոնում, որը մասնագիտացված է տվյալ հիվանդության բուժման ուղղությամբ, իսկ առողջարարական լոգանքները կարելի է իրականացնել մեկ այլ վայրում: Այսպես, հիվանդի սիրտանոթային հիվանդության վիրահատությունը կատարվել է Ղրիմի մայրաքաղաք Սիմֆերոպոլում, բայց ամբողջական կազդուրման համար անհրաժեշտ է բուժական ցեխեր կամ տալասոթերապիա, որն իրականացվում է Սակի քաղաքում (Ղրիմ): Մյուս կողմից, երբ բուժական և առողջարարական պրոցեսները համընկնում են նույն տարածքում, որտեղ առկա են երկու անհրաժեշտ աղբյուրներն, տեղի է ունենում համալիրային սպասարկում:

Որպես կանոն, բուժական զբոսաշրջությունն օգտագործում է բազմաթիվ հյուրանոցներ տարբեր կուրորտային վայրերում, որտեղ գործում են մասնագիտացված առողջարաններ՝ բուժական զբոսաշրջության կենտրոններ:

Առողջարանային ծառայությունները դասվում են թանկ ծառայությունների շարքին, քանի որ հիմնվում են բնական բուժիչ, թանկարժեք ռեսուրսների օգտագործման վրա, որոնց շահագործումը պահանջում է բժշկական բարդ տեխնոլոգիաներ: Առողջարանային ծառայությունների տրամադրումը անհնար է առանց հատուկ պատրաստված բժշկական անձնակազմի:

Կուրորտներում կիրառվում է հատուկ մասնագիտացված դիետիկ սնունդ, ինչը նաև պահանջում է հատուկ բժիշկ մասնագետի և դիետոլոգ-խոհարարների առկայություն: Դրա հետ մեկտեղ՝ առողջարաններում պահպանվում է վերականգնողական կենտրոնին բնորոշ ամբողջ կառուցվածքը՝ հանգստացողների բնակեցման հարմարավետ պայմաններ և նրանց հետաքրքիր, զվարճալի ու սպորտային ծրագրերով ապահովումը: Դրա համար էլ հանգիստը կուրորտներում միշտ ավելի թանկարժեք է բուժիչ հանգստի այլ ձևերից: Նման գրավիչ պայմանները նպաստում են կուրորտների օգտագործմանը՝ ոչ միայն առողջարանային-վերականգնողական, այլ նաև ուրիշ նպատակներով [5]:

Բուժական պրակտիկայում, բնական բուժիչ գործոնների օգտագործման հետ մեկտեղ, ներդրվել են ֆիզիոթերապևտիկ, հոգեթերապևտիկ և բուժման այլ մեթոդներ: Փոխվել է նաև հասարակության պահանջը կուրորտների նկատմամբ: Կարևոր նշանակություն են ձեռք բերել ոչ միայն բժշկական ծառայությունները, այլև համարներում հարմարավետության մակարդակը, կուրորտների՝ սպորտային սարքավորումներով զինումը, անհմացիոն ծառայությունների բազմազանությունը: Բժշկական ծառայությունների վրա ազդեցություն ունի նաև նորաձևությունը [6]:

Վերջին ժամանակներս արևմտյան կուրորտներն ուշադրությունը կենտրոնացրել են դեմքի և մարմնի կառուցվածքի ուղղման կոսմետիկ բազմաթիվ ծառայությունների վրա [7]: Ինչպես տեսնում ենք, առողջարանային ավանդական ծառայություններին ավելանում են նոր ծառայություններ, բուժման ու

հանգստի նոր ձևեր, աշխարհում արագորեն աճում է առողջարանային-վերականգնողական զբոսաշրջիկների թիվը:

Ըստ բնական բուժիչ գործոնների բնույթի՝ առողջավայրերը բաժանվում են 3 խմբի [8, 9]. 1) բալնոլոգիական; 2) ցեխաբուժական; 3) կլիմայական:

Բալնոլոգիական առողջավայրում հիմնական բուժական գործոնը հանքային ջրերն են, որոնք օգտագործվում են լոգանքների, ցնցուղման, լողավազանում լողալու, խմելու, ինչպես նաև ինհալացիայի, լվացումների, հոգնանների և ողողումների համար:

Ցեխաբուժական առողջավայրում գործածում են տղմացեխը, քաղցրահամ ջրերի նեխատիղմը, տորֆային, հազվադեպ ջրաջերմային և հրաբխային ցեխերը:

Կլիմայական առողջավայրում բուժմանը նպաստում են տեղանքի աշխարհագրական դիրքը, արևոտ կլիման, ռելիեֆը, անտառը, լեռնային օդը և այլն:

Արևմտյան և Արևելյան Եվրոպայի որոշ երկրներում առանձնացված են հատուկ չափանիշներ այն հյուրանոցների համար, որոնք մասնագիտացել են առողջության պահպանման կամ վերականգնման ուղղությամբ: Հատկանշական է Հունգարիան, հատկապես Բալատոն լճի հարավային շրջանը, որտեղ հյուրանոցը պարտադիր պետք է ունենա մեկ տեսակի լոգարան, երկու տեսակի շոգեբաղնիք, գեղեցկության սրահի հինգ տեսակ, հինգ տեսակի թերապևտիկ և նյարդերը թուլացնող, ուժերը վերականգնող սենյակներ [10]: Միևնույն ժամանակ հյուրանոցը պետք է ապահովի առողջարար և էկոլոգիապես անվտանգ սնունդ, մարզական սրահներ: Այժմ Հունգարիայի ավելի քան 50 հյուրանոցներ անցել են որակավորում և կրում են վելնես (Wellness) վարկանիշ [11]:

Այս համակարգն ակտիվորեն կիրառվում է եվրոպական մյուս երկրներում: Այսպիսով, բուժական և առողջարարական զբոսաշրջության գլխավոր առանձնահատկությունը նրանց զբոսաշրջային գործունեության աշխարհագրություն է, որը բնութագրվում է տարածքային ընտրությամբ ու աչքի է ընկնում առավել մեծ ընդգրկվածությամբ:

ՀՀ բուժ-առողջարարական հաստատությունների և համաաշխարհային փորձի ուսումնասիրությունները ցույց են տալիս, որ զբոսաշրջության համակարգում բուժականը գնահատվում է որոշակի չափանիշներով, որոնք ներկայացված են աղյուսակի տեսքով:

*Բուժական զբոսաշրջության չափանիշները և առանձնահատկությունները*

Չափանիշներ	Առանձնահատկություններ
տարածքի բնական ռեսուրսների ներուժը, որը նպաստավոր է բուժման և առողջության կազմակերպման համար	զբոսաշրջիկի երկարաժամկետ ժամանում կուրորտում
բուժումը և առողջության պահպանումը պետք է լինի զբոսաշրջիկի գլխավոր նպատակը	տարիքային խումբը՝ 40 և ավելի
հաճախորդին տրամադրվող զբոսաշրջային ծառայության մեջ առավելությունը տրվում է բուժականին	զնային բարձր մակարդակ
ծառայություն մատուցող կողմը պետք է ապահովված լինի բարձր որակավորում ունեցող բուժանձնակազմով	բուժման ոչ ավանդական մեթոդներ
կազմակերպությունները, որոնք իրականացնում են բուժում, առողջության վերականգնում, պետք է լինեն մասնագիտացված ձեռնարկություն և ունենան թույլտվություն տվյալ գործունեությունը ծավալելու համար	բուժման և հանգստի համատեղում
զբոսաշրջիկը նման հաստատություններում բուժում ստանալու համար պետք է ունենա հիվանդության պատմությունը հաստատող փաստաթղթեր	ապահովագրական ընկերության առկայություն

Աղյուսակից հետևում է, որ զբոսաշրջային այն ընկերությունները, որոնք մասնագիտանում են բուժական նպատակներով, ունեն գարգանալու իրական հեռանկարներ: Քանի որ բուժական զբոսաշրջությունն աչքի է ընկնում ֆինանսական բարձր գներով, ապա այն իր ծառայությունների համար ունի զգալի ֆինանսական միջոցներ, որոնք իջեցվում են պետական կառավարման մակարդակով: Այս մոտեցմամբ զբոսաշրջային կազմակերպությանը վտանգ չի սպառնում, զբոսաշրջիկին տրվում է մատչելի գներով բարձր որակի ծառայություն, իսկ տարածաշրջանի զբոսաշրջային այլ նմանատիպ կազմակերպությունների հետ տեղի է ունենում առողջ մրցակցություն [12]:

Այսպիսի մոտեցումներ են գործում հանրաճանաչ բազմաթիվ առողջավայրերում՝ Կառլովի Վարի, Բալատոն լիճ, Ոսկե ավազներ, Կիպրովոսկ և այլն: Այս առողջավայրերն ապահովում են սահմանափակ առողջարարական զբոսաշրջային փաթեթներ: Որպես կանոն, հաճախորդները փնտրում են վստահելի զբոսաշրջային ընկերություններ, որոնք մասնագիտացել են որոշակի տարածքում և իրենց գործունեությունն ուղղված է միայն բուժական զբոսաշրջությանը:

**Եզրակացություն:** Ըստ վերոնշյալի՝

- բուժական զբոսաշրջության առանձնահատկություններից է տարանջատված և համալիրային գործունեության իրականացումը;

- բուժական զբոսաշրջությունն, ի տարբերություն զբոսաշրջության որոշ տեսակների իր գործունեության համար ունի ֆինանսական միջոցներ, որոնք գերազանցապես իջեցվում են պետական կառավարման մակարդակով;

- բուժական զբոսաշրջության համակարգում ընդգրկված են զբոսաշրջության բազմաթիվ տեսակների տարրեր, որոնք ավելի արդյունավետ են դարձնում այն;

- բնության հրաշալիքները, հարուստ պատմաճարտարապետական ժառանգությունն ու բնակչության էթնոմշակութային առանձնահատկությունները նպաստում են վերականգնողական՝ կուրորտային առողջարանային, մարզական, էկոլոգիական, գիտաճանաչողական, բնակչության մասսայական հանգստի զարգացմանը:

Կատարվել են՝

- բնական բուժական ռեսուրսների (հանքային ջուր և պելլիդներ, ցեխեր, կավեր) գնահատում բուժ-կանխարգելիչ և բուժական պրակտիկայում կիրառման նպատակներով;

- հանքային ջրերի և բուժիչ պելլիդների քիմիական կազմի և ֆիզիկաքիմիական հատկությունների ուսումնասիրություն ըստ միկրոկոմպոնենտային, միկրոէլեմենտային օրգանական և գազային կազմի;

- հիդրոմիներալ ռեսուրսների առկա վիճակի և որակի գնահատում;

- հանքային ջրերի և բուժիչ պելլիդների (ցեխեր, կավեր, տորֆեր և այլն) համալիր ֆիզիկաքիմիական հետազոտություններ՝ նոր ժամանակակից միջազգային նորմատիվ պահանջներին համապատասխան;

- բնական և ֆիզիկական գործոնների ազդեցության մեխանիզմների ուսումնասիրություն;

- բնական կուրորտային ռեսուրսների բուժիչ և բնական հանքային ջրերի հանքավայրերի էկոլոգիական վիճակի ուսումնասիրություններ:

Անհրաժեշտ է՝

- ներգրավել ներդրումներ՝ հին առողջարանների վերանորոգման և նոր առողջարանների կառուցման համար;

- բարելավել առողջարաններում սպասարկման մակարդակը, սննդի որակը, կուրորտային հանգիստն ավելի հետաքրքիր դարձնելու նպատակով շատացնել ժամանցի հնարավորություններն առողջարաններում;
- քայլեր ձեռնարկել առողջարանային ծառայությունների գները նվազեցնելու ուղղությամբ՝ բնակչության լայն զանգվածներին այդ ծառայությունները հասանելի դարձնելու և այցելուների քիվը մեծացնելու նպատակով և այլն:

Ստացվել է՝ 05.02.2020

Գրախոսվել է՝ 25.02.2020

Հաստատվել է՝ 10.03.2020

#### Գ Ր Ա Կ Ա Ն Ո Ւ Թ Յ Ո Ւ Ն

1. <https://hy.wikipedia.org/wiki/>
2. <http://www.eurasianet.org/>
3. Деркачева Л.Н., Челнокова Б.И. Лечебно-оздоровительные местности юга Дальнего Востока. *Вестник ДВО РАН*, 5 (2000), 54–63.
4. Жинкин А., Паламарчук О. *Курортное дело, спорт и туризм. Кубань: история, экономика, культура*. Гл. VII. Краснодар (2001), 245–271.
5. Benson H., Stuart E. *The Wellness Book*. N.Y. (1992), 287 p.
6. <http://www.med-practic.com/>
7. <https://regnum.ru/news/economy/2145437.html>
8. <http://www.patientsbeyondborders.com/medical-tourism-statistics-facts>
9. <https://arlis.am/>
10. Թովմասյան Գ. *Առողջարանային գրաստանային էությունը և զարգացման արդի միտումները*: Տնտեսություն և հասարակություն (2011).
11. Kaufmann E. *Wellness-Tourismus*. Universitat Bern, Band 38 (2001), 29 p.
12. Ведмицкий В.А. *Врачующие воды, целебные ключи*. Дальневосточное книжное изд-во, Сахалинское отделение (1984), 3–68.

В. В. ГРИГОРЯН

### МЕСТО И ОСОБЕННОСТИ МЕДИЦИНСКОГО ТУРИЗМА В СИСТЕМЕ ТУРИЗМА

#### Резюме

Организация медицинского туризма в наши дни осуществляется в разных географических условиях, изучение которых имеет важное значение. В рамках данной статьи производится анализ особенностей размещения центров медицинского туризма в различных регионах мира, а также сделан сравнительный анализ некоторых показателей.

V. V. GRIGORYAN

### PLACE AND FEATURES OF THE MEDICAL TOURISM IN THE TOURISM SYSTEM

#### Summary

Nowadays the medical tourism is organized in different geographical environments and its study is very important. In the article a thorough analysis is performed connected with the medical tourism arrangement features in different regions of the world, standards are determined.